



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Taküm Rajasthan nung
süngdong crore 10 atemtsü

Russia-i menügdakba
ajakbo memeshitsüla

VOL. XXII ISSUE NO. 157 (ADOK 157)

DIMAPUR

KÜPTOKNÜ (SATURDAY)

METSÜREMI (MARCH) 22, 2025

₹ 5.00

NPF President-i party akangshitsü ayongzük

Jalukie/Dimapur, March 21, 2025 (TYO): Naga People's Front (NPF) President Apong Pongener-i Peren aser Dimapur district sema senzüdang party tashi itshtitsü atema mapa inyaksü ayongzükogo.

"Northeast nung regional party tejentiba ya NPF lir aser India nung tanabuba lir. Nagaland Legislative Assembly nung tang NPF MLA ana dang lir saka nübortem dak tera yanga lir. Tang ya party tashi aittsüba mapang ka lir" ta Jalukie nung sentong ka nung jembidang Apong Pongener-i ayongzük.

"Tening aser Peren constituency tem nung enrollment drive tenzüksüla aser lennir tajungtem jangiatettsüla. Iba ya inyaktetra candidate tem adoktsü" ta pai ashi.

Küm 53 tashi NPF tenzüka arudang takok aser tamakoktem ajangshia aruogo saka NPF mesamai dang arur kechiyong iba telok ya Naga yimten tebilemstü nung tera yanga lir. Yimtenren tensa tamajung ajurudang Kevichüsa Angami aser Dr. Shürhazelie Liezietsu nunger ama lennirtemi bendanga agüja inyakba bilemteter" ta paisa ashi.

NPF-i shilem agiba ajanga ceasefire aru, Election Commission of India nung register asü aser ajaki agizüktettsüsa Naga yimten latettsü atema elections mokdangogo, ta Apong-isa ashi.

Kümtem süia arudang party nungja tenetben tashi melenogo saka tamendakdak Fide Non Armis (By Faith, Not by Arms) memelenshi. NPF ya taoba nung

Nagaland People's Front ta liasü saka Arunachal Pradesh o Manipur nung Naga nunger dendaktsütsü atema tenüng melenshi aser tang NPF MLA 5 lir, ta paisa metetdaksü.

NPF Dimapur Division senden nung "ni küm 50 tema party tenzüka arur anungji kü tebilemstü khuretem nungi jena moutettsü. Politics nung temulung tila masütsüla, tanü ya asen party atema mapang tamajungtiba asütsü akok saka asenoki dang meranga inyakra aser party tashi itdaktsüra tajung ajurutsü ana nung dang lir" ta Apong Pongener-i ashi.

Paisa MLA ana- Achumbemo Kikon (NPF Secretary General) aser Kuzholuzo (Azo) Nienu na lenisüba atema tenügsang agütsü.

"Nagaland nung NPF divisions 14 lir saka tia maka office 9 dang lir. Asenoki nüngdakba infrastructure yanglutsüla kechiyong iba ya party tamendakdak lir" ta Apong-isa ashi.

"NPF touring team-i Kohoboto, Tseminyu, Kohima, Peren, aser Dimapur semogo aser kobi melii divisions ajak semdangtsü. Züngsem ajaki party tashi itdaktsütsüla" ta MLA & NPF Secretary General Achumbemo Kikon-ia ashi.

"State assembly nung NPF-i 'One Nation, One Election' magizükba metetdaksüogo. NPF tashi itta lir kechiyong nübortemi party meimer. NPF-i Nagaland nung opposition maliba sorkar pusemer saka party-i Naga yimten latettsü atema tenangzükba nung noktaka lir" ta Achumbemo-isa ashi.

Viksit Bharat Youth Parliament 2025 agir

Dimapur, March 21, 2025 (TYO): March 21, 2025 nungi Eastern Christian College, Padumpukhuri, Dimapur nung Viksit Bharat Youth Parliament 2025 (District Level) tenzüko.

Iba sentong ya Department of Youth Affairs, Ministry of Youth Affairs & Sports, Government of India ajanga ayongzüker aser March 22 nü tembangtsü. Taküm atema omenji "One Nation, One Election: Paving the Way for Viksit Bharat" lir.

Viksit Bharat 2047 alizüng ajanga India nüjiso ngur küm 100 ajungdang fully developed nation ka kümer alitsü asoshi lir ta Assistant Professor D. Athikho-i ashi.

2047 tashi nung Nagaland nungi lanur lennir kati national position tongtipang ka inyaksü imlar. Prime Minister Modi lenisüba asoshi pelar aser kaketshirtemi tajungtiba akümtsü merangtsü ayongzüker ta ta ECC Principal Dr. Dominic K. Khanyo-i ashi.

"Linük tarutsü yangerba nung arishi küm 18-25 ajanga tongtipang shilem agir. Anungji kaketshirtemi

süoki ia shilem agitsüla aser tanü nenoki shilem agiba ajanga asen linük tarutsü yangertsü" ta Dr. Khanyo-isa ayongzük.

District-level Youth Parliament sentong ya Ministry of Youth Affairs kübok ayongzüker aser iba sentong nung district 5- Dimapur, Chümoukedima, Peren, Niuland, aser Wokha nungi kaketshirtem adener.

Shilem agir nisung 202 nungi 127 tashi district-level round atema shimtetogo. Iba nungi kaketshir 10 shimteta state level nung oa shilem agitsü aser idakji kaketshir asem shimmer national round nung tokteptsü.

Fazl Ali College Mokokchung nung Viksit Bharat Youth Parliament 2025 (District Nodal Round) competition nung Yingli College Longleng nungi NSS, Volunteer Chuthaib L Phom-i mezüngbuba jenjang takok nguogo.

Mokokchung, Mon, Longleng, Tuensang, Noklak, Kiphire aser Shamator District nungi kaketshir 68-i iba sentong nung shilem agia liasü.

India sorkar tai sernung NSCN-IM dak tai tongloktsür: Q. Tuccu

Dimapur, March 21, 2025 (TYO): Naga yimten melatetba atema NSCN-IM dak tai tongloktsür saka shitakba nungbo India sorkari ang mapang atsülanger ta NSCN-IM president Q. Tuccu-i ashi.

Indo-Naga olemtep tenzüker küm 27 tema süia arur aser India-i Naga nunger melongjemdaksütsü atema telensa adoktsüba maparen inyaker. India-i olemtepdang NSCN tashimait kümdaktsür ta Q. Tuccu-i ashi.

Hokolbarnü Hebron camp nung 46 buba Republic day benjung amungdang pai iba osang metetdaksü.

NSCN-IM den August 3, 2015 nü Framework Agreement sign sütepba tashimait kümdaktsütsü atema Naga National Political Party (NNPGs) tentet. NNPGs den Agreed Position amshia India sorkari Naga nunger ratadaktsür, ta pai ashi.

India sorkari temoatsü agüja

Naga yimten telok aika tentetogo saka Naga yimten tebilemstü atema olemtep nungbo parnok jenjang kecha mali. Parnoki koma olemteptsüar memetet kechiyong Indo-Naga yimten tebilemstü ya tangatettsü tasak lir, ta Tuccu-isa metetdaksü.

India sorkari Naga nunger putiotsü aser yimten temeten toktsür parnok aginüba yimya nung olemteper. Iba jagi parnok India sorkari renemba Agreed Position nung sign asü aser tanü iba ya Naga putiotsü nung mapang tamajung ka ajuruba kümogo, ta paisa ashi.

Asenoki asen putiotsü, sobaliba aser temzüng nung noktaksi aser küm 70 tema kümzüka aruba asen linük maitsü sayudi. Ochi nung anidakba ya asen tashi ta asenoki angazükdi aser iba ajanga India sorkar den otsüsütsü aketba tenangzüktep ana- July 11, 2002 nung 'unique history of the Nagas' aser August

3, 2015 nung 'Framework Agreement' nung sign sütep ta paisa shisem.

"Asenoki tayongzükba jenti ajurua lir saka asenok külem alizüng aser tenangzükba nung asenok külem tashi lir ta bilemtetdi. Asenok tejakleni aodang asenoki rarayonga aruba atema bendanga agütsüdi aser asenoki inyakba ajanga asen lima tarutsü tajungba yangertsü" ta paisa ayongzük.

Tanü 46 buba Republic day benjungmung nung NSCN-IM-i taküm bendanga agütsür aser Naga linük yangerba nung shilem agiba Naga nunger ajak nem tetushi agütsü.

Naga Republic Day ya 'Nagalim linük' nung alirtem asoshi nüma atangba anogo ka lir kechiyong küm 45 tejakdang iba anogo nung asenoki asen lima madak ketdangtsütsü atema asen sorkar sangdonga liasü ta Tuccu-isa ashi.

Kohima nung tanü sorkar office ajak 'working day' asütsü

Dimapur, March 21, 2025 (TYO): Nagaland Home Department-i Kohima nung state sorkar office ajak March 22, 2025 (4th Saturday) nü working day asütsü metetdaksüogo.

Financial Year Closing atema March 22, 2025 nü office ajak lapoktsü aser iba den külemi Negotiable Instruments Act, 1881 kübok Banks aser Financial Institutes ajak working day asütsü ta Home Department-i

sangdong ka nung ashi.

Administrative Heads aser Heads of Departments ajaki pei pei Department nung ketdangsürtem aser staff ajak mapai arutsüsa inyaksü tetuyuba agütsüogo.

India sorkari Naga yimten latettsü mapang agir: Maj. (Rtd) R.M Lotha

Dimapur, March 21, 2025 (TYO): Ato Kilonser N. Kitovi Zhimomi-i abiba GPRN/NSCN pur 5th Mile Chumukedima nung 46 buba Republic Day mungogo.

Iba sentong nung Chaplain Nochotole Yosa-i temoatsü meshia sarasadem aser Maj. (Rtd) R.M Lotha-i wako atsüket.

"Naga yimten latettsüba maparen atsülangra iba tebilemstü khuretji India sorkari abentsü" ta Maj. (Retd) R.M Lotha-i o jembidang ashi.

"Tsüngremi kodanga Naga linük senzüka meyutsü aser Pa taochi aser tatok ajanga asenoki tanü iba tensa ajurua lir. Küm 46 tejakdang iba otsüsütsü anogo nung Naga putiotsü nung tongtipang tatalokba ka züluoka ayu aser ibaji Naga lima people's republic akümba lir" ta paisa ashi.

Asen lima asoshi taküm bendanga agütsür Naga nunger meyrjang aika nem tetushi agütsür aser parnok mapa tajung inyakba atema nüna atanger ta Maj (Retd) R. M. Lotha-isa ashi.

Naga nunger ajaki linük tenzüka wadang nung shilem agia aru saka iba atema India sorkari reshikangshiogo. 16-Point Agreement, 1960 aser Shillong Accord, 1975 ajanga Naga yimten tebilemstü koktettsü aser yimjung bener arutsü ta bilem saka iba ajanga

telensa ang tali adok aser terata ang bentsür aru, ta paisa ashi.

Iba sülen olemtep tenzüker tanü GPRN/NSCN-i WC/NNPGs den külemi November 17, 2017 nü "Agreed Position" nung takok ngua sign sütepogo aser India sorkar den October 31, 2019 nü olemtep tembangogo. Naga nunger putiotsü aser yimten temetentem nung tetsükdaktsü kecha melii aser civil societies ajak den angatettep iba tenangzüktep agi, ta Maj (Retd) R. M. Lotha-isa ashi.

Ajak atema tebenjem mapang ka lir aser Naga nunger külemi longjemtsü asoshi tang ya mapang tajung lir. Naga lennirtem, Civil society teloktem aser National workers ajak sabang ka nung longjemtsüla. Iba ajanga India sorkari "Framework Agreement" aser "Agreed Position" külemi lokteper "Common Draft" ka renemtsü ta paisa metetdaksü.

Naga nunger yimten latettsü atema kanga yongyar saka küm pungu tashi kecha mesüi dang arur. Anungji Naga yimten latettsü ano mapang agira iba tebilemstü khuretji India sorkari abentsü ta GPRN/NSCN President-isa ashi.

GPRN-i 45 buba Naga Republic Day amung

Government of the People's Republic of Nagaland-i March 21,

2025 nü tesem balala nung 45 buba Naga Republic Day mungogo.

People's Army of Nagaland GHQ, Suruhuto, Burmese Occupied Naga Lands nung Eastern Command base, CFSB office permits, Padumpukhuri aser 18 Regions, 2 Sub-Regions aser 3 Affairs nung sentongtem ayonga agi.

NSCN/GPRN, Ato Kilonser Ino. Starson Lamkang-i CFSB premises nung tongti tesemdang ama shilem agia liasü.

Ato Kilonser Lamkang-i 45 buba Naga Republic day benjung nung adener ajak dangi salem aben aser tanü tashi len ania aruba atema tesenteper ajaki Tsüngrem nem tenügsang agütsütsü ayongzük.

Naga nunger aser talisa NSCN/GPRN atema taküm bendanga agütsür ajak nem tenügsang agütsür. National workers-i Naga nunger taginüba ama inyaksü tenangzükba agishitsüla aser ajak dang tongtipangji Naga nunger longjemtsüba lir ta Ino. Starson-isa ashi.

Naga National Party tem den Civil Society külemi Naga nunger taginüba atema inyaka aotsü kanga tongtipang ta paisa ashi.

Iba sentong nung President, NSCN/GPRN Gen. Niki Sumi (Retd) indang presidential address zünga metetdaksü.

Nagaland Angh-i SANEI mungdang moatsü



Dimapur, Metsüremi/March 21 (TYO): Sociological Association of Northeast India (SANEI) mezügbuba mungdang Japfu Christian College nung March 21, 2025 nü alidang Nagaland Angh La Ganesan-i moaja liasü.

Iba sentong nung Angh Ganesan-i Northeast nung sobaliba balala, puti otsü aser lokti temelenshi indang jembia liasü.

Nüburtem takum indang document bendenba nung sociology ajanga tongti shilem agiba indang pai lemsatapa liasü.

"Northeast ya kanga kera tejakleni renloka aoba aser lisopur shisatsü wazüka ayuba

lemjem ka nung lir. Aser terenlok aser sobaliba ayak kasasa renloktsü kanga tongtipang lir," ta pai ashi.

Pai sociologist, policy yanglur aser nübur rongnung lenirtem dang gender equality, tetsür anema azüdokshiba, rongsenketzüng telemsa, migration, tzü mopung melenba aser libajen wazüka ayuba nung tongti shilem agitsü ayongzüka liasü.

Angh Ganesan-i lokti melenshitsü atema 'interdisciplinary research' aser 'academic collaborations' tongtipang lir ta ashi aser SANEI ajanga lokti temelenshi atema iba ama sentong ayongzüka atema

tenüngsang agütsü.

Ajak awajema research methodologies nungdaker, anungji nüburtem den jembishinütsü nungdaker aser lisopur aser tajemzüka jenjang nung alirtem indang academic aser policy sensaksemsüla, ta pai ashi.

Iba sentong ya Indian Sociological Society den lungjemer All India Sociological Conference indang Golden Jubilee Year nungtem nung ayongzüka liasü. Iba mungdang ya North Eastern Council (NEC), Shillong ajanga sponsor asü, kong region nung scholars, policymakers aser kaketshirtem lungjemdaksür.

Dimapur nung mejangjaba nisung tasü mang ka nguteta lir



Dimapur, Metsüremi/March 21 (TYO): Mejangjaba nisung (tebur) tasü mang ka Dimapur nungi RxR tsünga km 261/8-9 K/Khati tsütsü bridge No. 258/1-2 kübok lir, ta Govt. Railway Police Station, Dimapur nung

aliba Station Manager (OPTG) nungi March 21, 2025 anepdang 7:30 ako meta telephone ajanga osang ka arua liasü, ta Dimapur Police sangdong ka ajanga ashi.

Osang angazükba sülen duty nung alirtem iba tesemi arsanga

ao aser mejangjaba nisung (non-local) arishi küm 45-50 tsünga tasü mang ya bridge No. 265 teküboklen aliba angu, koba train ajanga tsükzüka yok südi ta temulung melemer bilemer.

Ozüng agi melaba maparen ajunga tembangba sülen tasü mang ya PM examination aser jangjatsü atema District Hospital Dimapur Morgue nung yua lir.

Iba nisungba ya half pant sentsü tanak, sweater sentsü tanen aser T-shirt sentsü puipuir sema liasü.

Kibur/kinunger/tembar temi Officer-in-Charge, Govt. Railway Police Station, Dimapur den Mobile No. 7085055021 ajanga

tongteprateptsü akok, ta Dimapur Police sangdong ajangasa ashi.



NAGALAND POLLUTION CONTROL BOARD

Signal Point, Dimapur - 797112, Nagaland

Tel.: 03862-245727, TeleFax: 03862-245726

Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaktsütsüla"
				11.03.2025	13.03.2025	15.03.2025	
1	Dimapur	Bank Colony	Residential	178	81	92	100 µg/m ³
2		Dhobinala	Commercial	240	106	143	
3		NPCB Office, Signal Colony	Residential	238	67	77	
4		Tenyiphe, Chumoukedima	Commercial	127	89	101	
5		Nagarjan	Residential	219	78	106	
6		Viola colony	Residential	158	93	104	
7		Burma camp	Commercial	214	71	122	
8	Kohima	Opposite NST Office	Residential	114	46	63	
9		PWD Junction	Commercial	156	98	125	
10		High School Junction	Commercial	208	120	162	
11		Midland (Upper)	Residential	97	70	86	

Iba osang ya nüboritem ajangzüksü atema Nagaland Pollution Control Board-i agütsür.

EDTC ajanga senden ayonger

Dimapur, Metsüremi/March 21 (TYO): East Dimapur Town Council (EDTC) ajanga sangdong ka nung, Daily Market Building, Purana Bazar, East Dimapur nung Allottees ajungdang dang allotment dak sendakba ken o jembitsü asoshi March 26, 2025 nikongdang 1:00 ako nungi senden ka East Dimapur

Town Council Office, NST ISTT Purana Bazar nung amentsü, ta metetdaksü.

Anungji Allottees ajungai iba senden nung original allotment order bener arutsü metetdaksür. Nenok ajak iba senden nung adentsüla aser madener nem nungdakba temerenshi agütsütsü, ta sangdong ajanga ashi.

EDTC ajanga Construction Permit & Trade License atema metetdaksür

Dimapur, Metsüremi/March 21 (TYO): East Dimapur Town Council (EDTC) ajanga sangdong ka nung, EDTC jurisdiction kübok kisü-jensü mapa metenzükdang Construction Permit meshitsü Municipal Act nung mela aliba ama iba sangdong agütsür anogo tenet tsünga EDTC office nungi Construction Permit meshitsü metetdaksür, ta ashi.

Latettsüba mapang nung nungdakba temelaba magira özüng agi melaba ama mera agitsü, mesüra construction permits meyipa agitsü, ta sangdong ajangasa ashi.

Trade License : East

Dimapur Town Council ajanga EDTC Jurisdiction kübok businesses, private institutions (school, hostel aser colleges), private training centre, pharmacies aser private hospital ajunga dang April 30, 2025 tashinung Trade License renew asütsü metetdaksü.

Iba totuyuba sülen manidaker nem temerenshi, senchi mesüra business operation nung tetsükdaksü ajurutsü, ta metetdaksü.

Anungji businesses ajungai özüng agi melaba ama maneni inyaka asoshi iba totuyuba sülen anidaktsü ayongzüker, ta sangdong ajanga ashi.

Mon DLSA ajanga insurance claim ka asangsang kumtsü



Dimapur, Metsüremi/March 21 (TYO): Mon District Legal Services Authority ajanga March 19, 2025 nü Mon nung alir tetsür ka indang insurance claim takok ngua bushitetja liasü.

Wannung kinungbo Y. Yongna Konyak ya June 25, 2022 alinen lendong ka nung asü. Saka SBI ajanga Wannung dang Non-Performing Asset (NPA) loan sen lakh ana temonoktsü lir ta osang agütsüdang iba ken o temai adok.

Iba mapang Mon DLSA teka amuok aser la kinungbo

indang policy ajanga SBI General Insurance kübok la insurance angutsü langa lir ta jangjatet. Ajisüaka nominee meputepba aser inyakyim nung tetsükdaksü ajuruba mechi lai iba insurance bushiba magizüki liasü.

Iba tensa angateta Mon DLSA ajanga la nem lenmang balala sayua aser yaritepa insurance agütsür den indang-indanga osang agitepa aru.

Ita trok yamaji atsütepa arur tatem nung la indang insurance claim ya agizüka la nem sen 6 lakh meshizüksütet.

Manipur nung KYKL, Prepak zü ngsem ana apu

Imphal, Metsüremi/March 21 (Agencies): Assam Rifles-i Manipur kübok Indo-Myanmar arrtsü meita aoba mapang telungpur telok ana nungi zü ngsem ana den prangbong injang aser tashishitsü aketba oset aika putetogo.

Official osang ajanga ashiba agi, arrtsü adener itangitertem nungi osang tejangja angazükba sülen central paramilitary personnel temi Bodhbarnü India tsütsü arrtsü tongshi number 76 temeket meita oa liasü.

Meita aoba mapang security forces-i PREPAK (Pro) zü ngsem Laishram Tomba Singh (27) apu. Pa ya Wangjing, Thoubal District nungi liasü. Sepaitemisa Wabagai Yangbi Mamang, Kakching District nungi Kanglei Yaol Kanna Lup

zü ngsem Yumnam Roshan Meitei (33) pua liasü.

Tena ket nungi ngutetba prangbong injangtem rongnung 5.56 mm Light Machine Gun (LMG) ka, LMG Magazine asem, LMG Magazine Drum ka, 5.56 mm ammunition 194, 7.62mm AK-56 Rifle ka, AK Magazine ana, 7.62mm ammunition 125, Bayonet (AK Rifle) ka, Motorola set den charger ka, Ammunition Pouch ana, Combat Dress ana, Rifle Sling ana, aser arem nung asema tsü ngsem ana densema liasü.

Osang ajangasa, spaitem apuba telungpur ana den tena ket nungi ngutetba hadirtem ken o dak sendaka aliba police station nem bendanga agütsüogo, ta metetdaksü.



March 21, 2025 nü Chandigarh nung aluyimertem lenir, Buta Singh Burjgill den tangartemi osangbenertem den jembidang tangokba noksa nung angur.

Nitish tekolok meshidak; par jabaso CM kümdaktsütsüla: Rabri Devi

New Delhi, Metsüremi/ March 21 (Agencies): Hokolbarnü Rashtriya Janata Dal (RJD)-i, JD(U) lenir aser Bihar chief minister Nitish Kumar-i linük naklu ken mezügmeshiogo, ta aija pa anema longkak aitogo.

Bihar assembly kima RJD MLA temi Nitish anema longkak aita pa anema yimyim ayim. New Delhi nunga Parliament kima RJD MP temi Nitish Kumar anema longkak aita lasü.

Brihostibarnü sentong ka nung linük naklu ken atemba mapang nung Nitish Kumar-i arakzüa state chief secretary den o jembia lasü. Chief secretary-i pa nungtemtsü merang, ajisüaka chief minister-i maneni pa den jembia.

Iba sülen-a Nitish Kumar-i maneni pa tejaken alirtem dang

teka amteper sayua lasü. Ajisüaka pa den külemi sabang nung alirtembo linük naklu ken metembang tashi indangindanga nokdaka lasü.

Opposition lenir, Tejashwi Yadav-i Chief Minister aija, iba tatalokba ya taaktsüka lir, ta ashi.

Osangbenertem den jembidang Tejashwi-i, "Nitish Kumar ya kü dang tambu aser pa ya Bihar Chief Minister lir, aser iba atemaji ni pa akhümtsübur. Ajisüaka yashi pai linük naklu ken mezügmeshiba yabo taaktsüka lir. Pai Bihar maaktsütsüogo," ta ashi.

Paisa, "Chief minister ya state nung tongti lenir lir, ajisüaka yashi tatalokba yabo taaktsüka lir. Tang mezügm India linük puti otsü nung chief minister-i linük naklu ken

mezügmeshiogo," ta metetdaktsü.

Taoba mapang chief minister Rabri Devi-ia Chief Minister aitsüba den külemi pa dang par jabaso, Nishant Kumar nem CM menden agüjang, ta ashi.

Rabri Devi-i, "Pa (Bihar CM Nitish Kumar) ya tekolok meshidak. Pa telokok meshidakra pai par jabaso chief minister kümdaktsütsüla, ta onoki akhanger," ta ashi.

Brihostibarnü Tejashwi-i, "Na (Nitish) ya state tuluka nung chief minister lir ta onoki nenshia metetdaktsü. Na shi nung aser tekolok naprongla nung tashimait. Iba ama state tuluka nung na maneni iba menden nung amenba ya state atema teblemtsü tulu. Yamai aiben Bihar mezügmeshi masütsüla," ta aija lasü.

Taküm Rajasthan nung süngdong crore 10 atemtsü: CM Bhajanlal

Jaipur, March 21 (Agencies): Hokolbarnü Rajasthan Chief Minister Bhajanlal Sharma-i, taküm state nung süngdong crore 10 atemtsü, ta metetdaktsü.

Paisa nüburtem dang tarutsü putu atema Rajasthan nung süngdong aika atemtsü ayongzü. World Forestry Day anogomong nung Jaipur nunga sentong ka ayongzüka agi aser iba sentong nung jembidang Chief Minister-i, Ato kilonser Narendra Modi-i ayongzüka 'Ek Ped Maa Ke Naam' campaign ajanga ajungmesoa state sorkari 'Mission Hariyalo

Rajasthan' kübok süngdong crore 50 atemtsü atema telemteba agiogo, aser iba mapatong kübok 2024-25 kümsük nung süngdong crore 7 tema lasü aser taküm state budget sangdongba den külemi süngdong crore 10 atemtsü, ta metetdaktsü.

"Süngdonglidong aser tenemtem ya asenoki külema lasü, aser akhidang nungi Rajasthan-i alima tzü-mopung wazüka arur," ta pai metetdaktsü.

Paisa nüburtem dang tarutsü pututem atema süngdong, arem aser arem shiruru kümzüksü

atema tenangzüka agiang, ta ayongzü.

Hokolbarnü Sharma-i Forest Department-i adokba 'Digi-One-Forest Stack' tenzüksüogo. Forest Department inyaksangshi teladak asütsü aser tajungtiba akümtsü atema IT technology tasentiba amshia iba app yanglu.

Iba anogomong nung Chief Minister-isa Sitamata Wildlife Sanctuary nung 'Eco Tourism Facilities' semzüksü, Keoladeo National Park, Bharatpur nung Golf Cart facility aser Nahargarh Biological Park semzüksüogo.

UAE nung India nunger 25 nem tasüba temerenshi obendang agüja lir

New Delhi, March 21 (Agencies): UAE nung India nunger 25 nem tasüba temerenshi obendang agüja lir, ta Parliament nung sorkari metetdaktsü.

Rajya Sabha senden nung tasüngdangba ka langzüdang Minister of state for external affairs, Kirti Vardhan Singh-i iba osang ya metetdakja lasü.

"Bendang linük balala nung India nunger 10,152 tepuokdak lir. Bendanglen jail nung puoka alirtem densema bendang linük balala nung aliba India nungertem kümzüka alitsü aser junga alitsü atema sorkari inyaker," ta Singh-i ashi.

Minister-isa, linük 8 nung India nunger nem tasüba temerenshi obendang agüja lir, ajisüaka tang tashi nungbo parnok nem tasüba temerenshi magütsü, ta metetdaktsü.

UAE nung India nunger 25 nem tasüba temerenshi obendang agüja lir, Saudi Arabia nunga India nunger 11, Malaysia nung 6, Kuwait nung asem aser Indonesia, Qatar, US aser Yemen linüktem shia nung India nunger kaka nem tasüba temerenshi obendang agüja lir.

"Bendanglen Indian Missions/Posts-i akokba tashi temerenshi obendang agüja aliba India nungertem den yariteper. Indian Missions/Posts-isa jail semdanga parnok ajuruba den külemi Courts, Jails,

Public Prosecutors aser tanga agencies den tongtepratepa inyaker. Jail nung aliba India nungertem atema temepishiba ken o agütsür aser taochi meshitsüba densema legal teyari balala agütsür," ta minister-i metetdaktsü.

Tesüba küm pongu tsüngda bendanglen India nunger kar nembo tasüba temerenshi agütsür asü?, ta asüngdangba langzüdang minister-i, Malaysia, Kuwait, Qatar aser Saudi Arabia linüktem nungbo India nungertem nem tasüba temerenshi agütsüogo, ta ashi.

2024 küm Kuwait nung India nunger asem aser Saudi Arabia nunga India nunger asem nem tasüba temerenshi agütsüogo aser Zimbabwe nunga India nunger ka nem tasüba temerenshi agütsü.

2023 küm nunga Kuwait nung India nunger pongu, Saudi Arabia nung India nunger pongu aser Malaysia nunga India nunger ka nem tasüba temerenshi agütsü.

UAE nungbo ketdangsertemi item ama osangji melemsateper, ta Singh-i ashi.

Ajisüaka UAE nung aliba Indian Mission-i, 2020 küm nungi 2024 küm tashi nung UAE nung India nunger ka nem danga tasüba temerenshi magütsü ta shiogo, ta metetdaktsü.



Mumbai, March 21, 2025: Shiruru tepsetba anema People for the Ethical Treatment of Animals (PETA) tentetla, Ingrid Newkirk-i Mumbai nung longkak aidang tangokba noksa nung angur.

Canada den tesendaktep yanglushitsü imlar: MEA

New Delhi, March 21 (Agencies): Hokolbarnü Centre sokari, Canada den tesendaktep yanglushitsü India-i melunga lir, ta metetdaktsü.

Ministry of external affairs (MEA) otongdar Randhir Jaiswal-i, "India aser Canada na tsüngda tesendaktep raksabaji Trudeau-i aniba Canada sorkari kiralongrar aser Separatist tem nem 'license' agütsüba ajanga lasü. Temelung lemtepa nung ajemdaker linük ana tsüngda tesendaktep yanglushitsü onoki imlar," ta metetdaktsü.

Canada nung India nunger security raksatsütsü atema inyaker Khalistanis jenokdaktsüba ajanga tesüba ita aika tsüngda linük ana tsüngda tesendaktep mejungi raksa.

Yaküm October ita nung Canada Ato kilonser Justin

Trudeau-i, Canada senso aser Sikh Separatist lenir Hardeep Singh Nijjar tepsetba nung India sorkar agency temi shilem agia lir, ta tai tonglokja lasü.

Taküm January 6 nü Canada Ato kilonser Justin Trudeau-i Liberal Party nungi anenba sangdonga lasü. Telung nung mangatettep ajanga pa leniba nung taruba election nung metokteptetsü, ta shia pai Liberal party nungi anen.

Canada Ato kilonser menden atema Mark Carney tenüng sangdongba sülen India-i iba linük denji tesendaktep yanglushitsü imlar.

Taoba mapangtem nung Carney-i India nunger rongsenkettzüng jenjang ainba aser India-i clean energy atema inyakba asoshi India tenüngsanga lasü.



New Delhi, March 21, 2025: Hokolbarnü Parliament kima RJD MP temi longkak aidang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 22, 2025

Janaona agi rongsen akümer

Tanü lima nung ya mapa inyak shia meteterem asoshibo kecha teindoktsü maka, kechiyong kidang bendenba janaona agi tanaben tagitsü kuma amshiteter. Ajisüaka, asenok asoshibo yimti nung janaona bendena endoktsüba ya tebilemtsüang tuluka kumogo, kechiyong asenoki tangar ama janaona agi tanaben tagitsü kuma yanglutsüba mapatem mashi, anungji akhi ama asenok asoshibo kidang amshir endokba janaonatemji tagidak makaba janaonatem lir. Ibayongji, asen lima nungbo, talisa Municipal aser Town Council purtem asoshi tebilemtsü tulutibaji janaona bendena endoktsüba ya lir. Aji oda, janaona ya nisung aliba tesem anasa mashi tesem nung endoktsü memelar, ibayongji janaona endoktsü asoshi tesem tetemsü mangur. Iba timtem jagi asü mesüra asenoki memetet aser mangatetba agiar, asenokibo yimti nung okdenba janaonatem ya ayong bushia oa tuoktsür, ajisüaka tanü putu yabo pei ki kilong aser kima dang masü saka ayong dena merükmerüka ayutsü merangba putu lir. Atangji, Municipal aser Town council nung alirtemia yimti nung oktenba janaona agi tagitsü kuma yanglutsü asoshi bilema alitsü, iba jagi center government nungi yokba sentongtem ajanga tanga department nungia kibong shia dustbin dena lemstsüba angurr. Ajisüaka, janaona agi tagitsü kuma yanglutsübaji kidang okdenba janaona tapu ajak 'dust bin' ka nung bendentsüba masü, saka ki shia dust bin asembosa alitsüla aser item dust bin asem rongnung ka nung shizüka aotsüba janaona (biodegradable), ka nung tanaben yanglua amshitetba janaona (recyclables) aser ka nung tanaben mamshitetsüba janaonatem bendentsü, anungji iba jagi koba jaonabo endoktsü aser kobabo meindoki amshitsü, aji melamelaa bendangteta yutettsü. Ashiko, idangjibo janaona ya ayoktsü mesüra alitsüa akok, kechiyong janaonaji tagitsü kuma amshir. Aji oda, asenoki metettsüba kaji shizüka aotsüba janaonatemji chiyongtsü aser süngotu amala, anungji item jagi ali temo kuma amshitetter aser ano tanaben tanga osettsüset yanglua amshitetsüba 'recyclable' osettemtemji kaket, plastic, glass aser yin amala osettem lir. Item nung madenba osettemjiang teindoktsüba janaonatem asütsü, anungji itemji nisung alidak nungi talangka pilar saka ayong anasa masü endoktsü atema janaona endokdak tesem mesemtetba ayutsü asoshi National Green Tribunal Authority ajanga government-i ozüing agüja lir. Ajisüaka, asenok dang ya iba ama teinyaksü mapatem indang tangatetba junga agüja malia ta bilemer aser agüja alinunga, nisungtem dang nungi bendenba janaonatem jagi tang asenoki tagitsü kuma inyaktettsüsa mapa tenzüka maka, anungji asenoki jembiyonga aser asenok dak tangatetba aliyonga Municipal aser Town Council nung lenirtemi janaona agi rongsen akümba mapa anagzüka metenzüktet tashi asenok asoshi tanga terenlok mapa inyaksüsbajibo yutsür janaona bendena endoktsüba tebilemtsü tuluba asütsü. Atangji, Municipal aser Town Council-isa masüyonga, lanurtem kari danga janaona agi tagitsü kümdaktsüba mapatem angazükba bener arua inyak nungbo ajisa tajungba asütsü. Aji oda, janaona agi rongsen akümba mapa nungji tazüing tashir aser mazüing memetetba lanurtem aika mapa angutsü. Janaona agi rongsen akümbaji yamaji akümer, ibaji kari angazüka bener arua inyak tenzük nungbo Nagaland nung tagitsü langkabosa adoktet tenzüker süla. Atangji, tanübo janaona agi rongsen akümba mapa angazüki bendangleni maoyonga, lanurtemi peisasa purapiteta inyaksü imlar. Tanü asen lima nung lanur techira aser tashitemeteter aika lir, item jagi tesem balala nung nübortem timtemba aser nüngdak reprangteta pei kolok aser pei dak aketba shisatsü aser temetetba agi mapa tapu balala purapiteta inyak tenzüksüla. Joko, Nagaland ya alima nübortem asoshi nüngdak apiteta yanglutsürtem aliba alima ka kumogo ta tangari shitettsüsa, talisa, lanurtemi pei dak aketba sempet, temetetba aser shisatsü amshia mapa tasen inyak tenzüksüla. Aji, tangar dak imlatsüba masü asenok dak nungi tenzüksüla.

OLEMSABANG

Naga nunger Politician-tem tangatetba melenshitsüla

L. Kika Pongener

Asen Naga nunger Politician-tem aser India lima tanga State nung alir Politician-tem tangatetba medemdanga reprangdanga, lenmang aisu nung kanga tetsüngda-ita lir. Tanga State nung alir Politician-tem dak Party manifesto/ideology nung akang-akanga ammetba, aser Election-i yir adoker külena kechi jenjang nung sudir suaka, Rulling nunga suang, mesura Opposition nunga suang, Party manifesto/ideology nung akang-akanga soiter marakzüi nokdakba, item ama Politician-tem angudang kanga nukshia repranger. Ajisuaka, kanga tesasatsüka, asen Naga nunger Politician-tembo kar dak alaka teimba ka, Election-i ayidang Party ka ticket ammer ayitsü, saka adoker külen jenjang mejungra, Party manifesto/ideology tangatetba kecha mali amai, oda jenjang ajunglen bushia sepla-sepshiba angudang nuburtem kanga sungmanger...!!! Political Party ka nung Membership akümbaji khen Election-i ayidang ticket angutsü atema membership akümba masü ta iba tangatetba Politician aika dak mali amai nuburtemibo repranger. Ano kangasa tesasatsü kaji, asen Naga nunger Politician karbo, Election-i ayiba ya, Election-i yir adoker MLA/Minister kümer, sen aika bendener, ki aika yangludena, kimong-lumong aika alidena, takar kuma alitsüba nukjidong nung Election-i ayir ama nuburtemi reprangteter. Ibajagi asen Naga nunger Politician-tem teimba ka Election-i ayiba ya asen lima renlokdaaktsütsü, nubur ajangzükdaktsütsü nukjidong nung masü, saka pei ajangzüksüba nukjidong nung Election-i ayir sudi ta nuburtemi bilemer. Ano Political Party balala nung tanishir 'Party Leader' & 'Party-worker'-tema teimba ka jenjang ajunglen bushia jangja-majang/teret-majang....tamongdak ka maka sepla-sepshiba angudang nuburtem sungmanger....!!!

Anungji, jokorla, asen Naga nunger Politician-tema, shirnok Election-i ayitsüba mulongteter....Parnok ajaki Election-i ayiba ya sen bushiba luyim ka ama tangatetba nung masü, saka pei akaba rongsen, nubur, shisatsü aser mapang ajunga tenla agüja, asen lima renlokdaaktsütsü asoshi, nubur atema mapa tajung inyaksü aser nubur ajangzükdaktsütsü nukjidong yur Election-i ayitsü tangatetba alitsüla. Tanu putu ama alima renloka tejakleni aoba putu ka nung, asen Naga nunger Politician-tema, jokorla, tangar den jangyumedema ibala tangatetba alitsübaji kanga tongtipanga aser ibaji nuburtem taginuba lir. Anungji, tang nungibo asen Naga nunger Politician shirnok Election-i ayitsü tebilemba lir, parnok ajaki pei akaba rongsen, nubur, shisatsü aser mapang ajunga, linuk aser nubur asoshi tenlatsü temulongtetba yur Election-i ayitsü apusotsüla. Shitakba-bo Election nungji sen meintoktsüla, saka asen Naga lima nungpo sen meintokra "Küpra tasüman nung Manga memedem" amai asütsü. Asen Naga lima State ngur joko küm roker (60 yrs) tema sua aor, saka ano tang tashi alima tazü jenjang nung aliba ya angudang kangasa sasar. Asen kidanger Manipur, Mekhalaya, Mizoram aser Arnachal Pradesh State-bo asen dang nungi tesulen-ang State anguba kangasa renloka tejakleni aoba angudang kanga nukshia repranger. Ajisuaka, tesasatsüka, asen Naga limabo ano tanu tashi alima tazü jenjang nung lir.

Naga nunger Politician-temi tang shiyunga aruba iba tangatetba nungji Election-i yira, alima aser nubur asoshi mapa tajung inyaksü. Ajisuaka, tang Politician-tem teimba kati angatetba amai, pei agitsüba aser pei ajungtsüba nukjidong nung dang Election-i yira, ibajagibo asen lima renloka tejakleni moodaktsütsü. Aji oda, Naga nunger Politician-temi sen/rongsen bendena takar akümtsüba, iba nukjidong yasa yur Election-i ayinungpo, asen lima kodanga merenloktsü, saka rajang dang akümtsü. Ajisuaka, Politician-temi ni kü rongsen, nubur aser mapang ozü lima aser nubur atema tenla agüja Election-i yidi, aser nuburtemi shimtetra, aser Rulling Sorkar nung adentsü maongka ngura, aser Minister menden atara, ni ozü lima aser nubur asoshi terenlok mapa inyaksü. Aji oda, Minister menden-sa mata-aka, MLA dang suaka, ni akokbatashi kü tashi (Capacity) yari ozü lima aser nubur asoshi mapa tajung karbosa inyaksü. Ano Opposition nung dang alitsüsa kümra, Opposition nung mener ozü lima aser nubur ajungtsü asoshi, ni tasü-ita Rulling Sorkar-i aibelena inyakbatem tsüngsu poa anidaktsü aser metongshitsütsü. Ni ozü lima yanglutsü aser renlokdaaktsütsü asoshi tasü-ita ochi jembitsü aser indang-indanga mapa tajung inyaksü....Aji oda, Naga nunger Politician-tem dak ibala tangatetba aser nukjidongji yur Election-i yira, kodaser asen lima merenloktsü aser tejakleni maotsü...??? Asen Naga nunger nuburtemi iba ama tangatetba akaba aser nukjidong akaba Politician kar danga adokdaktsünur aser asen lima nung yimsusudaktsünur. Naga nunger nuburtemi rongsen meimba masü alima nubur meimba Politician kar adokdaktsünur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Evangelical lenirtemi US Tir, Donald Trump atema sarasademtsü



March 19, 2025 nü Evangelical lenirtemi Oval Office nung US Tir, Donald Trump nem sarasademtsüdang tangokba noksa nung angur.

March 21, 2025: Tan hopta Evangelical lenir ter dak temai Oval Office nung US Tir, Donald Trump ajurua pa atema sarasademtsüogo.

White House Faith Office Senior Advisor Paula White-Cain leniba nung Khristan lenirtemi Bodhbarnü (March 19) Trump ajurua pa dak teka agi nemeter sarasademtsü.

Tir atema sarasademtsürtem rongnung National Hispanic Christian Leadership Conference nungi Rev. Samuel Rodriguez, Dallas nung aliba First Baptist Church nung Pastor Robert Jeffress, Alabama nung aliba Pathway Church nungi Pastor Travis Johnson, WallBuilders nungi David Barton, taoba mapang Tir candidate Gary Bauer aser Baptist Leadership nung executive director William Wolfie nung liasü.

White House Faith Office nung faith advisor Rodriguez-ia Trump atema sarasademtsü.

California nung aliba New Season Arogo nung pastor, Rodriguez-i, "Tepela nung ajemalua onoki Tir Trump atema sarasademtsür. Nai pa shim aser tang ama tensa ka nung Nai pa mezüja shimtetogo. Onoki Nü dang Yisu zü agi pa meshitetjang aser pai ochishia aser temeim agi inyaksü atema pa nem tashi agüjang, ta

sarasademer," ta sarasadem. "Temenen nungi pa kümzüka aser pa taküm nung Nü sentong atalokjang," ta pai sarasademja liasü.

"Pa lenisüba nung America nung Isaia 58:8 nung shia aliba ataloktsü atema onoki tamang agi sarasademer. Tekümetji anepdang ama arutsü. Yiruba zübo kera aneptsü. Tsüngrem sentsüwangshi ajanga asenok kümzüka tejakleni anitsü. Yisu tenüng nung sarasademer, Amen" ta pai sarasadema liasü.

Oval Office nung Trump ajurutsü jakdang Khristan lenirtem tamasa ajurutepa liasü.

Rodriguez-i, "Tamang nung ajemdakba team ka ama onoki senden nung tamang nung ajemdakba mapatongtem aser asalentong balala atema jemb. Tan Oval Office nung ajurutepba ya jangratemtsüka liasü. Onoki Tir ajuru aser sarasadem mapang agiogo," ta metetdaksü.

Rodriguez-i, "Iba ya Tir matsüngdang kibong züngsemtem tanaben ajurutepba amai liasü. Iba telongjem jangratemtsüka liasü," ta pai ashi.

Paisa, "Kü akümli mapang nung tamang tsütsü No. 1 Tir lir. Iba ya Ronald Reagan mangdang atalokba lir. Ni tanur asüba mapang nung Ronald Reagan ajanga ajungmesoba ni

bilemteter. Pai tamang indang jembia liasü. Iba ya pa mangdang atangji atalokba lir," ta ashi.

Trump mezüng 2017 nungi 2021 küm tashi Tir inyakba mapang nung White House nung pai Evangelical lenirtem aiben ajurua liasü. Pai Rodriguez, Franklin Graham aser James Dobson nung densema Khristan lenirtem aika ajuru. Ajioda mapang balala nung Khristan lenirtemi Oval Office nung Trump atema sarasademja liasü.

2018 küm August ita nung White House-i "state dinner" ka ayongzüka liasü aser iba sentong nungji Evangelical lenir 100 dak tali jaoka liasü.

Trump mezüng kümsük Tir inyakba aser kümsük tasenba na nung Trump-i Khristan lenirtem züngshiba nung temelenshi lir asü?, ta asüngdangba langzüdang Rodriguez-i, yaküm election atema nüboyimdang kari Trump khasettsü merangba ajanga pa dak temelenshi tulu adokogo ta ni bilemer, ta ashi.

"Tsüngremi pa taküm kümzüka, anungji pa taküm kuli ajanga tamang jenjang-a tajungba kümogo. Tsüngremi tiyongtsüi aita mapa inyakba aser pa kümzüka ajanga tang Tir Donald Trump Oval Office nung lir," ta Rodriguez-i ashi.

ANOGO ABEN TSÜNGREM DEN

Temenen nangzükba

Menangzüki aliba temeneni taochi kishi shibanger. Temenen nangzükba jagi taküm nung takümstsü tzü talubosa agizükdaksür.

Asen menen nangzükba jagi asen taküm nung Tsüngrem nem kishi lapoktsür saka asen menen miimbanga yura asen sasa mejembitetba Khrista dang nungi pilaa aor. Asenoki asen menen nangzükra, asen dang asen menen adoktsü pa temulung lemtetba aser ochi lir, aser pai asenok temeshiba nung merüktetdaksütsü.

Anungji, ni anogo shia Kibuba tsüngdang tatok nangzüktsüla. Ni kodang Kibuba dang kü tamakok ashitsü tenzüker, aji ni takok lenmang nung jajatsü tetenzüker lir. Ni kodang kü menen asoshi mokorai lidir satan kanga pelar. Ni kodang Kibuba nem kü taküm bendanga agütsür satan sentong ajak benjatsür. Kodang ni laor, ni temenen tali bendenloker. Menangzüki aliba temeneni miim chanu rizüker aser tesempatsü mapatem rizüker. Taküm kobai temenen nangzüker, parnokji Tsüngrem taochi agi meshitettsür aser temenen ajak okdoktsür. Nai ya amanger asü?

CBCK Women Ministry-i Anna's Ministry tenzük



March 20, 2025 nü Chakhesang Baptist Church, Kohima (CBCK) Women Ministry indang Anna's Ministry tenzükba sentong nung G. Rio School nung Managing Director, Khrienuo Moa-i jembidang tangokba noksa nung angur.

Impur nung 'Tanelar Phusemer' sentong ayongzüka agiogo



Impur, Metsüremi 21 (TYO): Metsüremi 20 & 21, 2025 anogotem nung Impur nung ABAM Church & Mission Ministry ajanga ayongzüka "Tanelar Phusemer" angazükshi sentong ka takok ngua agiogo, ta ABAM Officiating Executive Secretary, Rev. L. Yapang Mollier-i sangdong ka ajanga metetdaksü.

Tanü Arogo nung tanelar wadang nung tongti shilem agiba telok ya "Tanelar Phusemer" telok ya lir. Tsüngremi nisung nem agütsüba sempet rongnung jangratemtsü sempet ya iba

tanela phusemba sempet ya lir. Arogotem nung tanela asüngsashi sentong balala nung shilem tulu agia aika tanela nung aniteta tepela taküm lia odor. Parnok ya lenmang aisü nung tongti shilem agirtem, ta angateta kati ka nungi angazüka tim yimya nung shilem tuluba agitettsü nükla yur iba sentong ya agiogo.

Sentong nung Shisa Len Sayur, Rev. Dr. S. Wati Aier aser Mrs. Imtijungla Longchar na liasü. Agüja aliba onük "Ni Ya Shiba" aser "Pei Tajaba Metetba Taküm" nung

ajemdaker pei tajaba tejangja angateta kulisüba mapa den taküm libaliro ajanga sayutetba taküm asütsü tesayuba tajung agüja liasü.

Metsüremi 21 anepdang 6:00 ako nungi 8:00 ako tashi ABAM nung tenzükertemi anir sentong nung adenertem ajak lumia sarasademba mapang tajung agia temoatsü tulu nguogo.

Maneni Tanelar Phusemertem tanela wadang inyaka aodang Tsüngremer teyari nung inyaksü sarasademer.

Kohima, Metsüremi/March 21 (TYO): March 20, 2025 nü

Chakhesang Baptist Church, Kohima (CBCK) Women Ministry-i Anna's Ministry tenzükogo.

Anna's Ministry ya kijalir tetsür/amitsürtem tanela tsütsü nungittsü aser ajungshitsü atema lir. Tasen Lai nung Anna taküm otsü ajanga ajungmesoa iba ministry tenzük.

Anna otsü ya Tasen Lai nung osangtajung kaket Luk nung lir. La ya ainkar ka aser amitsür ka liasü. Lai Tsüngrem külemba aser lumia sarasademba nung mapang indok.

G. Rio School nung Managing Director, Khrienuo Moa aser Cancer Foundation, Kohima nung Tir Rev. Moa Longchari natia "Pursuing God's Heart" omen nung ajemdaker jembia liasü.

Lai Anna taküm otsü nungi

tongtibang tangazütsü asem lemsatep.

Mezüngbuba nung- Tsüngremi asen taküm len anir, aser Tsüngrem sentong nung tamang katetba den külemi asen taküm nung Pa sentong angatetba; tanabuba nung- Tsüngrem nem Nü tazüngla taküm melendakjang aser Pa nem nü taküm süngdakjang; tasembuba nung- taküm tetezü keta liang aser Tsüngrem sentsüwangshidaksüba den tangar tenzüktsü atema pei taküm bendanga agüjang.

Pastor Athono Rhakho leniba nung iba sentong agi, Petelhouviü Vese-i Tsüngrem temoatsü meshia sarasadem aser Aneile Rhakho-i taküm kuli lemsatepa liasü.

CBCK nung senior pastor Rev. Dr. Kevekhala Lasuh-i ministry tasen semzüktsü aser Committee züngsemtem atema sarasademja liasü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Telok

- (n) nisung aika agi akümba (group, crowd)
* Naga nunger telok tapu aika kümogo.

Teloktep

- (n) tatentep, temang nung teret ajurutepdak (joint)
* Ni alang dang tepi teloktep raksa.

OLONG PAITEP # 7098

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN

1. Tebendang mali - (4)
6. Songjen / Melemsai - (7)
7. Maka _____ er - (4)
9. Adok - (6)
11. Songtem - (3)
13. Meilungi, Moi ata - (5)
16. A _____ gnep - (3)
17. Tar tatsü - (6)
20. Ano tashi maküm - (4)
24. Tenüng kasa - (7)
25. Kioktsü yangluba tou ka - (4)

LANGTSÜNGLEN

1. Taksep - (3)
2. Langtem - (5)
3. O amentakdak - (4)
4. Pei tebu dang ajaba - (3)
5. T _____ k - (3)
6. Apitet - (5)
7. Shirangdang achiba - (4)
8. Anogo semer ka - (3)
10. Lipoker - (3)
12. Tebur tsünga jatepba - (4)
14. Teka amtep - (5)
15. Tenüng atet - (3)
18. Mejanga onü - (5)
19. Nülak ama - (4)
21. Aou tapu ka - (3)
22. Nübo teyi - (3)
23. Aginüdaktsü - (3)

OLONG PAITEP # 7097 TELANGZÜBA

TIPIEN :

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa, 15. Putir,
16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA



Alima nung valid credit cards teimtiba bendenba nisungji Telangana kübok Hyderabad nungi Manish Dhameja lir. Pai iba otsü ya April 30, 2021 nü yanglutet aser iba anogo tashi nung pa ket nung valid credit cards 1,638 bendenba liasü.

Arunachal police-i inter-state narcotics syndicate ka makdok



Itanagar, March 21, 2025 aru.

(Agencies): Arunachal Pradesh police-i inter-state narcotics syndicate ka makdokogo aser iba telok ya Chimpu nungi mapa inyaka

Arunachal police-i drugs ayoker ana apuba aser tena ket nungi heroin 60.4 grams, Rs 40,000 aser two-wheeler ka ngutetogo.

Operation Dawn kübok SDPO Itanagar DySP Kengo Dirchi-i anir police telok kati iba mapa inyaka liasü.

Bikash Barman-i heroin ayokdang apu aser pa dang asükdangya asükdang Bidi Bida nung Junaki Boje'er ("Didi") ki mita ao. Idakji heroin packets aser sen angu.

Iba syndicate yagi Assam aser kidanger state nungi drugs bener aru aser Capital Region nung lema yokshi.

Police-i drug networks samatsütsü aser Arunachal lanurtem drugs nungi jenbua lidaktsütsü atema meranga inyaker ta SP Capital Rohit Rajbir Singh-i ashi.

BJP MLA-i opposition aitsüba ajanga assembly nung mepetmesü adok

Guwahati, March 21, 2025

(Agencies): Assam Assembly nung BJP MLA Rupjyoti Kurmi-i opposition züngsemtem dang o tamajung shia raratepba ajanga tensa mejungi aküm.

Iba tatalokba atema opposition party temi tejashi sayua assembly nung medeni lungkak aita liasü aser deputy speaker-i minute 10 atema senden athi.

Public Works Department (PWD) atema grant asoshi Kurmi-i cut motion nung jembidang opposition MLA tem-Akhil Gogoi aser Sherman Ali Ahmed nati pa tejembidak nung meinpronga liasü.

Independent MLA Gogoi-i o ashiba atema tejashi nung

Kurmi-i pa dang o tamajung shia rara.

BJP MLA Kurmi-i o tamajung jembiba atema Ahmed-i ashishitepdang Kurmi-i opposition bench ajunga den raratep.

Leader of the opposition aser Congress MLA Debabrata Saikia-ia Kurmi-i o tamajung jembiba atema aitsü aser Deputy Speaker Numol Momin dang zülüoka ayutsü ayongzüik. Ajsüaaka, Kurmi-i pa menden toktsür Ali aser Gogoi mena alibalen i ao aser idangji pai Saikia dena opposition MLA tem aitsü.

Idangji marshal tem tiyongi ait aser Mariani MLA Kurmi sot. Kurmi-i pa mendeni meyipa

orr amenba sülen Momim-i pa dang ibala yimya mebeshi tekümdangtsü ashi aser MLA Kurmi-ia tatok meshi.

Momin-isa iba mapang o tamajung jembiba ajak record nungi agentsü tetuyuba agütsü saka Opposition puri ibaji magizük aser Kurmi merenshitsü takhangba agütsü.

Akhil Gogoi-isa pabo o jembiba atema House nungi anentsü saka Kurmi-ibo opposition bench amaktsü merangaka temerenshi kecha mali ta ashi.

Deputy speaker-i Kurmi memerenshiba atema opposition MLA temi lungkak aitba sayua session nung minute 10 madentsü ta shir kimai alu.

Arunachal nung POCSO kübok jenshia arur ka apu

Itanagar, March 21, 2025

(Agencies): Itanagar Women Police Station nungi telok kati March 21, 2025 nü arishi küm 50 tain tebur ka puogo.

Arunachal Pradesh kübok East Kameng district nung POCSO kübok ken o ka benoka aliba nung ajemdaker Eka Rimo apu.

Eka Rimo-i jenshia aru aser pa aputsü atema police-i nübortem dang nungi teyari meshia liasü.

Tanü SI Bamang Yakum, Ct. S. Pangtok, H/C Patel Nikhil (CRPF), aser Ct. Madi Walappa (CRPF) nunger dena WPS Itanagar nungi teshimtet telok kati Rimo apu.

Eka Rimo ya asür Kali Rimo'er jabaso lir aser pa ya Fengche Rimo Village nungi lir. Pa ya Transmission, Planning & Monitoring Zone, Itanagar nung Assistant Engineer (AE) inyaker.

Tanü pa apuba sülen Seppa police ket nung agütsüogo aser parnoki iba ken o atema inyaka aotsü.



Dubai nung Meghalaya premium ginger ajungketogo aser iba ajanga alimai iba süngmok tajungba meteta kümogo. Meghalaya nungi aluyimer 8-i Dubai semdangtsü maongka angu aser parnoki international markets tajungba metetba den alima shishilembaren angatetogo. Iba osang ya Meghalaya Chief Minister Conrad Sangma-i metetdaksü.

Russia-i menüngdakba ajakbo memeshitsüla: Zelenskyy



Kyiv, Metsüremi/March 21 (Agencies): Volodymyr Zelenskyy-i Ukraine aser US ketdangsürtem yimjung ken o jembitsü atema taruba Hombar Saudi Arabia nung ajurutetsü ta ashi, kong US-Russia lenirtem kasa anogo ajurutepan kembishinütsü ta Kremlin-ia shia liasü.

"Rara atsülangtsüsa Russia Tir Vladimir Putin-i menüngdakba meshiba anentsüla," ta Ukraine Tir Zelenskyy-i ashi. Moscow-i akhangba nungya Ukraine nem mitkar teyari agütsüba ajunga tembangsü dena lir.

Zelenskyy-isa NATO nung Ukraine züngsem akumtsü indang jembishinü mesüra, ibaji Russia asoshi sempet tulutiba alitsü ta tekumgangsü ashi, koba Putin-ia yimjung asoshi jembitsü makokba maparen ka lir ta shia lir.

Paisa US Tir Donald Trump den phone ajanga jembidang Ukraine indang nuclear power plants tem nung US kibur kumdaktsütsü jembi ta White House-i ashiba ya tiazü lir ta ashi.

Küm asem dak tali raraba sülen linük ana tsüngta ceasefire alitsü asoshi US tetsüngai ia jembitsü merangba mapang ka lir.

Zelenskyy aser Putin nati US den sensaksem dang principle nungbo ceasefire alitsü mulungtepogo, ajisüaka taginüba nung mebutepba ajanga asangsang kuma moteter.

Tesüsa Russia leniri energy infrastructure nung tayimtsü amshia amakba anentsü mulung - saka anatsülen nungi yamaji amakba manener.

Russia-i amakba nung kumzüka yunüba ki o jen tenüngtem Hombarnü jembishinü dang Ukraine delegation-i US nem agütsütsü, ta Zelenskyy-i ashi.

Oslo nung Norway Ato Kilonser Jonas Gahr Store den külemi osangbener senden ka nung jembidang US-i Ukraine indang nuclear power plants nung kibur akumtsü White

House-i jembiba indang asüng dang, Zelenskyy-i item ajungaji tai ta langzü.

Trump den phone ajanga jembidang Zaporizhia power plant indangbo jembiogo - tang koba Russia nungeri amokbanga lir - saka nuclear power plants ajunga Ukraine nüburtem indang lir, ta pai ashi.

Ajisüaka sen indoka mesüra tajungba kuma yanglushitsü atema Russia ket nungi US-i agitsübo kecha masü, ta pai ashi.

Tawa US Secretary of State Marco Rubio-i item infrastructure tajungtiba nung kumzüka ayutsü asoshi US kibur akum tajungba ta shia liasü.

Russia nem litsü kar, talisa Crimea agütsütsü renema lir asü ta asüng dang dang, "Ibaji Ukraine indang peninsula ka lir aser Crimea ya ozü linük nung tongti shilem ka liasü," ta Zelenskyy-i langzü, koba 2014 nungi Russia ket nung lir.

Russia-i amokbanga pari rakzüko go ta jembiaka alimai Crimea ya Ukraine linük nung shilem ka ama agizüka lir.

Ceasefire ji komaka asütsü ta asüng dang dang, mezüng noklem nung ceasefire ya ali aser tzüym nung alitsüla, kechiaser ibaji ajanga dang Russia-i tashiyim amshia amakba anentsü ama Ukraine-i ajiteter, ta Zelenskyy-i ashi.

Mongulbarnü Putin den phone ajanga jembidang Trump-i energy infrastructure nung ceasefire asoshi tezüngzüktep ka yanglutsüsa jembitet, saka iba dak alaka kecha melemtet.

Yimjung tezüngzüktep koba nung südir süaka NATO nung Ukraine züngsem mekumdaktsütsü aser Ukraine ya neutral alitsü atema Moscow-i guarantees bushitsü, ta Russia indang deputy foreign minister Alexander Grushko-i hopta tetenzüklen shia liasü.

US Defence Secretary Pete Hegseth-ia iba military alliance nung Ukraine adentsü teimla mali aser ken o jembishinüa tangatettep kati aruba nung aji asangsang masü ta ashi.

US education department shibangtsü Trump-i meyongnem agütsü

Washington, Metsüremi/ March 21 (Agencies): Department of Education shibangtsü atema executive order ka nung US Tir Donald Trump-i meyongnem agütsüogo, koba pai election nübuyim mapang nangzüka aser mapang talangka nungi conservatives kari inyaknüa liasü.

Iba agency yagi tesüngmangtsüka tamakok ajuruogo ta Republican tiri aitsü aser par ket nung aliba sen ajak states shia nem meyiptsütsü nangzü.

"Asenoki akok tashi tekeratiba nung shibangtsü," ta Trump-i ashi, ajisüaka White House-ibo agency ka shibangtsü asoshi Congress indang act ka nüngdaktsü ta ashir.

Iba mera nungya legal tsütsü tayongzüka tem ajangshi tenzüko go, kechiaser taoba hopta iba agency shibangtsü aser staff ajemtsü sangdongba nokdangtsü meranger lir.

US nung tanur timba public school nung azünger, koba angati aser local ketdangsür temi lapoker.

Federal education indang budget ya \$238bn

department ajanga US school tem lapoka aser curriculum yanglur ta nüburtemi mashi leni angateter, saka item ya states aser local districts temi inyaker.

Primary aser secondary schools atema funding shilem tilaka - shilem 13 shi - federal funds nungi arur. Sen timba state aser local taxes nungi arur.

1979 küm amenokba education department yagi student loans ketdang asür aser makamaiter kaketshir yariba sentong tem yanglua inyaker.

Ajisüaka iba yagi lanirtem dang "racial, sexual aser political material" sayutsü meranger, ta Trump-i aitsür.

Brehostibarnü White House nung school desks nung tanur temi lungbanga mener, "Education nung danga linük dang nungi US-i sen tali indoker, ajisüaka kaketshir rank tsünglanglen lir," ta Trump-i ashi.

US-i education nung par GDP shilem 5.4 shi indoker, aser ibaji linük aika dang kanga timba saka ajakdang timbabo masü, ta Unesco Institute for Statistics ajanga ashi.

Taoba küm department indang budget ya \$238bn

(£188bn) liasü, koba federal ajanga indokba shilem ana dang tajemba.

Iba executive order ya legal tsütsü tayongzüka ajurutsü amai lir, aser Trump administration-i federal government tilaba kumdaktsütsü merangba nunga tayongzüka ajurua lir.

Iba meyongnem agütsüba sentong nung Trump-i Linda McMahon tenüng asang, shiba pai department anitsü asoshi shim aser la ya secretary of education tatembangba asütsü imlar ta ashi.

Administration nung la inyaktsü atema pai langka kar bushitsütsü ta Trump-i ashi.

Trump-i iba totuyuba nung meyongnem agütsüba sülen Louisiana Republican Senator Bill Cassidy-i department shibangtsü nükjidong nung legislation bener arutsüba sentong tem sangdonga liasü.

Ajisüaka Senate nung Republicans ya tera agi (53-47) dang timba lir aser federal department ka shibangtsü vote 60 nüngdaktsü, anungji iba nükjidong atongtsü mapang agitsü.

(Maneni tapak 8 nung...)

Sudan army temi tir aliba ki tanaben agitetogo



Khartoum, Metsüremi/ March 21 (Agencies): Sudan army temi parnok den rara aliba paramilitary Rapid Support Forces ket nungi Khartoum nung aliba tir indang ki tanaben agitetogo, ta mitkar lenirtemi ashi.

Social media nung video aser noksa tem prokshiba nunga sepaitem pelatepa prangbong ayiptena, ola agütsü aser temokok agi ali nung tsükiter sarasadema liasü.

Küm ana tejakdang RSF temi linük yimtiba nungi army aridok saka ano parnoki tanaben agitsü amai ajiteter.

Paramilitary teloki tang tashi sangdong kecha agüja mali.

Army indang odongtar Nabil Abdallah-i state TV nung, mitkar temi central Khartoum nung palace aser ministry building tem agiogo, ta

ashi.

"Asen sepaitemi tsükchir sepai aser hadir tem okshia samatsü aser nok-nü aser hadir jenti rakzü," ta Abdallah-i ashi.

"Takok anguba tatem matong tashi onoki maneni raratsü."

Küm ana shi jakdang Khartoum nungya civil war tesashi tenzü aser yangi tongpang tesashia kar rara liasü.

Rara tenzüka sülen RSF temi Sudan linük yimtiba tesem tuluba aser linük anüolen tesemtem agia liasü.

Khartoum tanaben agiba ya Sudanese Armed Forces asoshi takok tulu asütsü aser iba rara nung tongtipang mapang ka alitsü. Tawa army temi Sudan tiyonglen tesem kar nunga tajangzü ngua lir.

Brehostibarnü Republican

Palace anasa drone aser tayimtsü amshia amakdang ola tulu adoka apokba nüburtemi ashi.

Honibarnü video recording ka nung RSF commander Mohamed Hamdan Dagalo, shiba dang Hemedti ta ajar, pai par paramilitary group kübok aliba presidential palace aser temeket tesemtem kumzüka ayutsü nangzüka liasü.

Pai ano linük north len aliba yimti kar amaktsü amokmerena liasü.

Yimjung asoshi inyakba maparen aika chirepogo aser telok ana yagi tongtipang tesemtem agitsü asoshi maneni raratsü nangzüker.

Iba rara ya ajanga alima nung humanitarian crisis tulutiba adokdaktsü, ta UN-i ashir aser RSF o army anaprongi meimchir temeden anema inyak ta tai tongloktür.

Ao Riju Sangdong

Ao Senden akhüm nung, Ao Riju-i achaayanga Ao oshi nung Kaket zülurtem atema SHISHAMOLU sentong ka, Rongchii 26, 2025 anogo, Aor Kilem, Sangtemla Ward, Mokokchung nung akatsü. Anungji Aotsür Aor shirnoki osang zülutsü, sangro, yimdangjem, otsüoem, o meyipzüka, taküm otsü yamala zülutsü janrar, parnoki Rongchii 15, 2025 tashi nung, agüja aliba Mobile number nung tongteprateptsü metetdaktsür.

Iba sentong nung adentsü mezüng tenüng agütsürtem nem tama maongka agütsütsü. # 7085176274 ; 8837379996

Sd/-
Prof. Rev Rongsen Lkr
Chairman

Sd/-
Dr. Imlirenla Walling
Convenor

1st U-23 National Championship pre-quarter nung Nagaland tsükogo



Dimapur, Metsüremi/March 21 (TYO): Nagaland U-23 basketball team-i otsü yanglua 1st U-23 National Championship indang pre-quarterfinals tonga asaya, aser ibai national level basketball asayamung nung state-i iba jenjang tongtetba ya tang mezüngbuba alitsü.

Punjab den asaya mezüng

quarter nung 21-18 agi Punjab temaba jenjang nung liasü.

Nagaland team-i temulungtetba tulu nung asaya saka asaya tembangdang 51-92 liasü. Parnoki tamakok ajuruaka asayamung tepiyong kanga meranga aser junga asaya sempet tajung aliba ajiteta liasü.

Team captain Neisezo Theunuo-i alakteta asaya points

22 nguteta külem asayartem ajungmesoa liasü.

Iba asayamung pre-quarterfinals tonga asayadang Nagaland team tajangshiba jenti liasü. National level nung toktepba ajanga asayar jenjang tali tejangjaba meteter aser parnok asayatsü sempet tali tajungba kuma temulung uludaktsür.

Linük nung team tajungtem den asayaba ajanga Nagaland team tangazükba liasü aser tarutsü nung itemji amshia asayatsü imlar.

Nagaland team-i iba jenjang tongteta asayaba asoshi Nagaland Basketball Association tejak tenteter aser asayar aser coaching staff nem tenüngsang agütsür, ta Sentiningsang Longkumer, Honorary Secretary, NBA ajanga sangdong ka nung ashi.

Jalukie nung tetsür atema badminton asayamung tenzükogo



Dimapur, Metsüremi/March 21 (TYO): Peren District kübok tetsürtem asoshi Open Badminton Tournament ka Peren District Administration ajanga District Hub for Empowerment of Women (DHEW), Peren den lungjemer Indoor Badminton Stadium, Jalukie nung March 21, 2025 nü tenzükogo.

Iba asayamung tenzükba sentong ya Deputy Commissioner, Peren, Hiazu Meru-i sentong akhumdong ka

ama moaja liasü.

Pai iba asayamung lapoktsüba sülen Deputy Commissioner & DPO Peren, I. Tsungrosongla Ao aser ADC Peren, Keyirangding Hegui & CDPO Jalukie, R. Chirhotshu Nyusou nungertem exhibition match ka asaya liasü.

Iba asayamung ya category asem lemsar asayar - kija, tarep aser tarep temeyoktep, kong tetsür 55 shilem agitar aser asüng, Honibarnü tembangtsü.

Miami Open: Coco Gauff & Aryna Sabalenka nungeri takok angu

Miami, Metsüremi/March 21 (Agencies): World number one Aryna Sabalenka aser third-seeded Coco Gauff nunger Brehostibarnü Miami Open nung round tanabuba asaya nung takok angu, saka seed tenet buba nung alila Elena Rybakina bo America tsür Ashlyn Krueger-i tsükdaktsüogo.

Sabalenka-i Bulgaria tsür Viktoriya Tomova madak 6-3 6-0 agi takok angu, koba minute 58 asaya liasü aser Gauff-i 2020 Australian Open champion Sofia Kenin madak 6-0 6-0 agi minute 47 nung takok ngua liasü.

Deobarnü Indian Wells final nung Russia tsür arishi küm 17 tain Mirra Andreeva-i akokla Sabalenka asoshi South Florida asayamung ayong ayonga tenzükogo.

"Ni iba takok anguba atema kanga pelar. Yangi tera

tenüshiba amai bilemer, kechiaser ball ajanga temanga taretba amai bilemer," ta Belarus tsürlai ashi.

"Mopunga aon, anungji stadium balaka nung asayar ama liasü. Ajak tasen amai lir, aser mapang agitsü," ta lai ashi.

"Tanü ni kanga junga asaya liasü aser la asoshi asaya tajungtiba ka masü südi. Tajungtiba asayar asoshi tanü scoreline ama masütsü, anungji ni yangi mener lai tajungtiba nung asayaogo ta mashitsü," ta Sabalenka-i ashi.

Taoba hopta Indian Wells nung Belinda Bencic-i tsükdaktsüla Guaff-i, "Asaya nung ni kong nokdaka aliar ni meteta lir. Au ni bilemba ama masayatet, saka asenok tang March ang lir aser season November ita tembangtsü. Renloktsü atema mapang peria lir," ta ashi.

Arishi küm 20 tain Krueger

asoshi top 10 nung alir madak mezüng takok angubaji 2023 Miami Open finalist Rybakina madak 6-4, 2-6, 6-4 takok anguba ya alitsü, koba ghonda ka ser minute 50 asaya liasü.

America tsür aser world number 40 nung alila Krueger ya taruba round nung Canada tsür Leylah Fernandez den asayatsü.

Defending champion Danielle Collins-ia kanga saka Romania tsür Sorana Cirstea madak 6-4 7-6 (7/3) agi takok ngua round of 32 atema jenjang alangzükogo.

Maneni 2022 Miami Open finalist Naomi Osaka-i seed 24 buba nung alila Liudmila Samsonova madak 6-2 6-4 agi takok ngua American wildcard Halley Baptiste den asayatsü.

Baptiste yagi seed 12 buba nung alila Russia tsür Daria Kasatkina madak 3-6, 6-4, 7-5 agi takok angu.

Shakib Al Hasan tanaben ball ontettsü

Metsüremi/March 21, 2025 (Agencies): Taoba mapang Bangladesh team captain Shakib Al Hasan, bowling action meshidakba atema tenokdangba agütsür aliba agintsüba sülen pa maneni ball ontettsü.

Tenokdangba agintsüba sülen pa ODI asaya aser league balala nung ball ontettsü, kong pa Test aser T20I nungi anenba sülen maneni asaya arudar.

"Osang ya shitak aser ni tanaben ball aontsü atema temelaba agütsüogo," ta Shakib-i Cricbuzz dang ashi.

Ajisüaka Shakib-i pa action atema tasembuba reassessment kong agi iba indang memetetdaktsü.

Shakib tatamsa 2024 küm October ita India den Kanpur nung tanabuba Test asaya nung asaya liasü.



English County nung Surrey nungi asayaba mapang pa indang bowling action ya meshidak ta ngutetba sülen pa nem December ita tenokdangba agüja liasü.

County asaya ya taoba küm September ita asayaba liasü, saka Loughborough University nung independent testing indang

result ya December ita sandonga liasü.

Iba sülen arishi küm 37 tain asayar ya ano January ita Chennai nung tanaben tendang saka takok mongutet.

Ibayongji pa ICC Champions Trophy atema Bangladesh team nung mezüngoksem, koba pai pa asoshi international cricket nung tatembangbuba asayamung asütsü akok ta shir liasü.

Bangladesh team taruba ODI asaya Sri Lanka den asayatsü lir aser iba atema Shakib shimsü akok, kechiyong pa Indian Premier League mesüra Pakistan Super League nung masayatsü.

All-rounder asayar ya taoba küm IPL auction aser PSL draft nung shilem agi saka shingai meshime liasü.

BENDANGLI OSANG : Tapak 7 nungi...

US education department shibangtsü...

Department ya yoktsü akok, ta osangtem meshibangaka Trump ajanga shia liasü.

administration ajanga senotsü agütsüba aser staff tem ajemdaktsütsü, aser kasaji US Agency for International Development (USAID) den inyaka lir, koba tatem nung par sentong aser humanitarian mapa aika anentsüsa akum.

Iba executive order nungya administration-i koba mapa inyaktsü aser koba sentong tem anentsüar tejangja shia mali.

Yangji McMahon dang department shibangtsü asoshi nüngdakba mera ajak agitsü aser itemji state aser local government nem tashi agütsütsü shia lir.

Maneni America nunger metaloka aliba services, programs aser benefits tem tajungtiba nung agütsüdaktsütsü la dang ashi.

La tezüngzüktep agir mapang tatsüka tsüngta McMahon-i department nung inyaker nisung 4,400 nem "Our Department's Final Mission" nüngja agütsür memo ka yika liasü, koba Trump-i shibangtsü nükjidong aliba athishir ama liasü.

"Tarutsü putu asoshi kaketshir nem tatembangba aser amadoktsü makokba public service inyaktsü maongka lir," ta lai zülü.

Trump-i department indang sentong kar tembangja aser kar danga department dangi

Democratic telok nungi taoba US tir Jimmy Carter-i amenoker küm ana dang lir pa melensang Republican telok nungi Ronald Reagan-i agientsü ayongzüka liasü.

Tir indang cabinet nung iba ya agency tilatiba lir aser federal budget shilem ana dang tajemba agir.

Department of Government Efficiency (Doge) lenisüba nung Trump administration-i nübu ajemdaktsüba ajanga education department nung staff kar dak kongshiogo.

Agency nung nisung 2,100 jungnüa Hokulbarnü nungi leave nung yutsütsü lir.

BILEMDANGANG

"Ka ita alirtem dang akümtsüburtem nungi pila liang."